

Bismillah-ir-Rahman-ir-Rahim

**MANQABAT DER SHAAN-E (IN HONOUR OF)
ASH-SHAYKH AS-SAYYID IMAM HAZRAT
AL-HABIB AHMAD MASH-HUR BIN TAHA AL-HADDAD
AL-‘ALAWI AL-HUSAYNI
Quddisa Sirrahu’l ‘Aziz**

Shaykh-e kamil hain Ahmad-e **Mash-hur**
sab muhibbin ki nazar ka **surur**

Phool Tayba ka hai Yemen mein *khila*
faiz jis se zamaane bhar ko *mila*
Nur say ho geya jahan **ma‘mur**
Shaykh-e kamil hain Ahmad-e **Mash-hur**

Aik ta‘bir *khwaabe* Bat-ha ki
ik kiran *Aftab-e-* Bat-ha ki
ban gae subh-e dil nashin ka **nur**
Shaykh-e kamil hain Ahmad-e **Mash-hur**

Zahay qismat wo din *zuhur* huwa
zang jis se dilon ka *dur* huwa
jaan-o dil jis se ho gaey **mas-hur**
Shaykh-e kamil hain Ahmad-e **Mash-hur**

Taaj-e ‘azmat mein hain *nagina* aap
Zaair-e *Makkah-o-Madina* aap
Shahzaada-e khaandaan-e **huzur**
Shaykh-e kamil hain Ahmad-e **Mash-hur**

Rabb ko *manzur* aap ka i‘zaaz
Hajj-e *mabrur* aap ka i‘zaaz
dil mein hai ‘ishq-e Mustafa ka **wufur**
Shaykh-e kaamil hain Ahmad-e Mash-hur

Husn-e *tanwir-e* Hazrat-e Haddad
aap *tasvir-e* Hazrat-e Haddad
Hazrat-e Taha ki nazar ka **surur**
Shaykh-e kamil hain Ahmad-e **Mash-hur**

Shan-e saadaat ay Khuda ke *wali!*
aap ka khulq ‘aks-e khulq-e *Nabi*
har bayan se ‘ayaan hai shaan-e **huzur**
Shaykh-e kamil hain Ahmad-e **Mash-hur**

Sidq-o *taslim* aap ka manshaa
Haqq ki *ta'lim* aap ka manshaa
faiz-e 'aam aap kaa rahaa **dastur**
Shaykh-e kamil hain Ahmad-e **Mash-hur**

Harf-e haqq aap ka har aik *sukhan*
hai laqab aap ka Imam-e *Yemen*
nutq se hain malaika **mas-hur**
Shaykh-e kamil hain Ahmad-e **Mash-hur**

Rahbar-o rehnuma *tariqat* kay
aap 'aamil Kitab-o *Sunnat* kay
aur Shari'at hai aap ka **manshur**
Shaykh-e kamil hain Ahmad-e **Mash-hur**

Sirr-e Ganjina-e *Khuda* hain aap
Qasim-e Nur-e *Mujtaba* hain aap
Kashf-e asraar par rahay **maamur**
Shaykh-e kamil hain Ahmad-e **Mash-hur**

Manzil-e a'laa kay *Makin* hain aap
Ghawth-e A'zam ke hum-*nashin* hain aap
aap ke martabay ka kis ko **shu'ur**
Shaykh-e kamil hain Ahmad-e **Mash-hur**

Haq numaa baat *baat* aap ki hai
Deen ki tafsir *zaat* aap ki hai
Qurb-e Mawla ka aap bakhshain **shu'ur**
Shaykh-e kamil hain Ahmad-e **Mash-hur**

'Ilm-o ihsaan mein *kamaal* hain aap
Rushd-o 'irfaan ki ik *misaal* hain aap
aap sidq-o safa ke hain ik **tur**
Shaykh-e kamil hain Ahmad-e **Mash-hur**

Zaat-e Haqq ka **shu'ur** baant-tay hain
aap Wahdat ka *nur* baant-tay hain
Zikr say teergi hui **kaafur**
Shaykh-e kamil hain Ahmad-e **Mash-hur**

Baagh-e Jannat ki kunjyon ka *pata*
aap ki seerat-e mubin se *mila*
sab ki bakhshish hai aap ko **manzur**
Shaykh-e kamil hain Ahmad-e **Mash-hur**

Nisbat-e shaykh ka hai yeh *khaasa*
ho woh Toronto ya ho *Mombasa*
hai muridin par nazar **bharpur**
Shaykh-e kamil hain Ahmad-e **Mash-hur**

Hijr kaysa hai kaisi *majboori*
aankh say doori bhi hai kia *doori*
qalb-e ushshaaq mein hai un ka **zuhur**
Shaykh-e kamil hain Ahmad-e **Mash-hur**

Jin ko *nisbat* hai shaykh-e kaamil say
haan *mahabbat* hai shaykh-e kaamil say
ranj rehtay hain un dilon say **dur**
Shaykh-e kamil hain Ahmad-e **Mash-hur**

Jaan-e ikhlaas Asfiyaa' kay *rafiq*
mayray ustadh mehrbaan-o *shafiq*
jin ko tadrees par kiya **maamur**
Shaykh-e kamil hain Ahmad-e **Mash-hur**

Pir-o Murshid ka sar pe *saayaa* hai
nisbat-e Awliya' se *paayaa* hai
'azmat-e Awliya' ka hum ne **shu'ur**
Shaykh-e kamil hain Ahmad-e **Mash-hur**

Paak naam-o *nasab* Habib ka hai
sab peh laazim *adab* Habib ka hai
qalb mein qalb-e Mustafa ka **nur**
Shaykh-e kamil hain Ahmad-e **Mash-hur**

Yaa Ilahi! ba-naam-e Shah-e *umam*
sadqa-e husn-e Taajdaar-e *haram*
ho ataa sab ko hubb-e **al-Mash-hur**
Shaykh-e kamil hain Ahmad-e **Mash-hur**

Manqabat by: Syed Hamid Yazdani
Toronto, Ramadan 1431 A.H.
www.madrasahidaya.net/ManqabatHabib.html

Transliteration by: Siddiq Osman Noormuhammad
Toronto, Rajab 1442.

